

四庫全書

子部

欽定四庫全書

子部

六藝之一錄卷

六十九
七十

詳校官中書臣陸 湘

貢外郎_臣牛稔文覆勘

總校官檢討_臣何思鈞

校對官中書_臣陸 湘

謄錄監生_臣范 鐘

欽定四庫全書

六藝之一錄卷六十九

錢唐倪濤撰

石刻文字四十五

唐刻豐碑

五原太守郭英奇碑

蘇頌撰銘顧誠奢八分書韋述撰序乾元二年五月

金石錄

慕容承初碑

泉隱撰田隱頴書顧誠奢篆額至德二年立

京兆金石錄

贈太保郭敬之碑

侍中苗晉卿撰中書侍郎平章事蕭華書敬之字敬之華州新鄭人仕至壽州刺史以子子儀貴追贈太

保碑以肅宗元年建寅月立

集古錄目

岷州司馬梁思楚碑

郭翁撰衛秀集王右軍書上元元年十月

金石錄

秀筆工之善模者也其自謂集書信矣無足多取也

書譬君子皆學乎聖人而其所施為未必同也

集古錄

工部尚書來曜碑

張鎬撰序蕭昕撰銘韓擇木八分書肅宗御篆額上

元二年正月

金石錄

太尉李光弼碑

顏真卿撰張少悌行書廣德二年十二月

金石錄

張少悌書此碑在張誼書姜嫄碑之上後五百年有巾男子盛時恭借姚氏法書四十種內有此帙敬為

書評歸之

立續記

張少悌書在當時不大知名而此碑殊勁拔清圓深得右軍行草遺意惜殘缺不完且于李公中興偉畧

不得一一證之唐史耳

石墨鑄華

今在富平縣儒學

金石文守記

贈左僕射韋陟碑

李紆撰姪元正書上元元年

京兆金石錄

上柱國任君碑

正書上元三年十一月今在汾州府南門二里文侯

村任君名恭官至金紫光祿大夫上柱國臨濟縣開

國男貞觀十七年二月卒

金石文
字記

臧希晏碑

廣德二年朝議郎守衛尉少卿淮陽縣開國男韓秀

弼八分書書法清勁可喜其能不因開元帝之好而

變者乎

兖州山人
兼

尚書臧懷恪碑

右唐臧尚書墓碑顏魯公撰并正書尚書墓在陝西之三原縣顏公此刻人間少傳子向以使事道陝得之尚書七子希崇希旭希忱希愔希景希晏希讓皆為顯官而希讓至魯國公顏公文集復有臧氏糾宗碑書七子官爵與此不同

金薤
琳瑯

臧懷恪碑顏魯公撰并書懷恪再為王峻蕭嵩兵馬使積官右武衛將軍封上蔡縣侯三贈而至工部尚書則以子希讓貴故也兄懷亮至左羽林大將軍懷

恪有子七人咸顯而希讓官至尚書節度使魯國公
碑稱兄弟子姓勲賢間出自天寶距於開元乘朱輪
而拖珪組者數百人而唐史不為立傳故聊載之書
法偉勁不減家廟茅山而石完不泐尤可喜也金石
錄又載韓擇木書第三子太子賓客希枕碑及希晏
碑皆韓秀弼書之希讓胄士也而能為不朽計乃爾

誠有過人者矣

弇州山人藁

國子司業顏允南碑

寶應元年立在使廳

京兆金
石錄

碑不見其首尾其字畫與所敘述蓋真卿所撰并書

其兄允南之碑也

集古
錄目

右顏氏殘碑以家廟碑攷之是顏允南碑也家廟碑

云允南歷殿中膳部司封郎中司業金鄉男此碑云

肅宗入中京遷司封尋封金鄉縣男又云遷國子司

業此碑云二子頰缺頰好為五言詩授校書郎早卒

家廟碑亦云頰好五言校書而此碑又云與弟允臧

同時臺省則為允南可知不宜惟書類事家廟碑云
侍郎蔣冽賞其判此碑云為雀器所賞小不同爾

集古

錄

余謂顏魯公書如忠臣烈士道德君子其端嚴尊重
人初見而畏之然愈久而愈可愛也其見於世者亦
不必多然雖多而不厭也故雖其殘缺不忍棄之

同上

吏部侍郎鄭英齋碑

張楚金撰史惟則八分書并篆永泰元年十一月

金石

錄

贈太子賓客田道生碑

于益撰摯宗行書并篆額永泰元年

京兆金石錄

太子太傅庾光先碑

徐浩撰史惟則書永泰元年

京兆金石錄

鄂州長史游浦碑

八分書書撰人姓名殘缺永泰二年

金石錄

贈潞州都督桑如珪碑

陳翊撰張少悌正書永泰元年

京兆金石錄

贈華州刺史顏顯甫碑

孫男真卿撰并書永泰二年

京兆金石錄

京兆尹鮮于仲通碑

顏真卿撰并正書大曆二年正月

金石錄

右唐鮮于仲通碑顏真卿撰并書仲通以多財結楊

國忠薦為劍南節度使討南詔蠻大敗國忠為諱之

再薦為京兆尹其始卒無他可稱見於史者惟嘗表

請國忠兼領劍南節制及為國忠立碑頌功德耳魯公為此碑稱述甚盛以此知碑志所載是非褒貶果不可信雖魯公猶爾況他人乎明皇實錄稱仲通以漏禁中語貶邵陽司馬而碑言為國忠所忌貶小人之交初以利合終以敗理固然也

金石錄

左驍衛將軍郭英傑碑

徐浩撰張芬正書大曆二年七月

金石錄

亳州刺史劉瓌碑

路隄撰李著八分書并篆大厯二年十月

金石錄

嚴浚碑

席豫撰徐浩行書大厯二年立

金石錄

右唐嚴浚碑徐浩書題禮部尚書襄陽縣開國子席某撰而其名殘缺不可辨按天寶中席豫嘗為此官而碑未有云豫平生交好知其為席豫撰也唐書列傳云浚華州華陰人而碑言馮翊臨晉人碑文字剝落所存無幾惟其首大字十二尚完好筆法奇偉可

愛云

金石錄

郭英入碑

元載撰史惟則八分書大曆三年正月

金石錄

右唐郭英入碑元載撰按唐書百官志開元中增集

賢待制官至永泰時勳臣罷節制無職事皆待制于

集賢門凡十三人今此碑載英入永泰元年實領此

職余觀常述所撰集賢堂記開元天寶間凡隸名于

集賢者皆一時文學之選蓋官以待制為名所以備

人主顧問言語侍從之臣也今乃以武夫庸人參于其間可乎代宗之政其紀綱廢弛者多矣豈特此而

已哉

金石錄

沛縣令于默成碑

子休烈撰劉單銘史惟則八分書大曆三年正月

金石

錄

魏少游碑

徐浩撰并行書大曆三年三月

金石錄

贈司空李楷碑

楊炎撰史惟則八分書并篆額大曆三年立

諸道石刻錄

贈太常王仁忠碑

江夏太守李邕撰都水使者集賢殿學士史惟則八分書仁忠字揖太原祁人位至左千牛衛將軍永泰

中以子奩贈太常卿碑以大曆三年立

集古錄目

萬年縣令徐昕碑

韓雲卿撰韓擇木八分書李陽冰篆額大曆四年三

月金石錄

右唐徐昕碑韓雲卿撰碑云昕為并州錄事參軍相國姚元之為法曹嘗部人部人誣上反狀天后臨朝方樹刑威詔公先假風憲然後按詰公表直元之則天大怒將貶鼎鑊終能犯顏曉辨正刑而出果如雲卿所書昕可謂賢矣而唐史不載其事因為錄之昕

者有功從弟其忠厚之性固宜異於他人也

金石錄

吏部侍郎王延昌碑

兵部郎中邵說撰廣州都督徐浩八分書延昌京北
人官至吏部侍郎集賢院待制碑以大厯四年立

集古

錄
目

贈揚州都督段府君碑

楊炎撰蕭正正書大厯四年十月

金石錄

唐張增段行琛碑此碑名不著而書法道逸豈美極
是當家書者為張增增無書名亦可以知唐人能書
者多矣非此碑則後世不知有增也按碑行琛者忠

烈公秀實父忠烈兄弟四人長祥頴次公次秀成次
同頴史傳不著因為拈出碑又不署撰文者姓名豈
即張增邪忠烈公汧陽人碑在汧陽完好可搨趙明
誠金石錄又有一碑云楊炎撰蕭正書與此不同而
却無此碑豈段公有二碑邪書之以俟考

石墨
鵠華

唐段行琛碑大厯十四年張增楷書李同系篆額

金石

左武衛中郎將臧希忱碑

韓擇木撰并八分書大曆四年

金石錄

贈鄆州刺史張大詢碑

于益撰從姪彥之書大曆四年

京兆金石錄

贈大尉辛雲京碑

元載撰史惟則八分書并篆額大曆四年

京兆金石錄

東都留守李愷碑

中書舍人李紆撰洪州刺史沈傳師書商州防禦隨

軍儲或篆額愷隴西成紀人官至禮部尚書東都留

守祿山叛攻東都城陷死之追贈太尉謚曰忠毅碑

以大厯四年立

集古
錄目

左僕射裴冕碑

元載撰吳通微正書大厯五年四月

金石
錄

贈梁州都督徐秀碑

顏真卿撰韓擇木八分書李陽冰篆大厯五年四月

金石
錄

麗正學士殷踐猷碑

顏真卿撰并正書大曆五年五月

金石錄

大斌令殷攝碑

顏真卿撰并正書大曆五年

金石錄

特進梁公碑

王修然撰王軌行書大曆六年四月

金石錄

桂州都督程元英碑

李邕撰張庭珪八分書大曆七年五月

金石錄

北海太守李邕撰黃門侍郎張庭珪八分書元英字

文繹廣平人仕至桂州都督府長史贈秘書監碑以

大曆七年五月立

集古錄目

程元英碑陰贈詔并重立碑記男程皓撰程廩正書

大曆七年五月十五日立在龍門

復齋碑錄

唐相宋璟碑

撫州刺史顏真卿撰并書璟字子 缺 邢州南和人官

至尚書右丞相封廣平公謚曰大貞碑以大曆七年

九月璟孫儼追建

集古錄目

右唐宋璟碑顏真卿撰并書唐書載廣平六子曰升
尚渾恕華衡今此碑言公有七子曰復昇尚渾恕延
華衡乃八子也魯公所撰廣平碑側記亦曰公之第
八子衡謫官沙州蓋廣平實有八子唐書闕復延二
人而此碑魯公誤書八字為七爾又碑云廣平自吏
部侍郎兼攝尚書左丞而史不載後自楚州刺史歷
魏兗冀三州兼河北按察使遷幽州都督復為魏州
而史但言歷兗冀魏三州刺史河北按察使進幽州

都督而已史又載廣平為廣州都督時郡人為環立
遺愛頌環上疏辭讓有詔許停而碑乃云燕公張說
嘗為碑頌今燕公集中實有此文豈已為文而未嘗

刻石歟

金石錄

玄宗時宋璟為廣州都督廣州舊俗皆以竹茅為屋
屢有火災璟教人燒瓦改造店肆自是無復延燒之
患人皆懷惠立頌以紀其政

宋公神道碑獨完好惟碑側記缺八字碑去官道二

里餘世罕知者以故久不顯于世致君因謁墓下始
得之且難舊史不載新書闕遺乃刻顏公體大書字
畫別刻于石庶久其傳邢惟襄國舊都丘塚纍然類
皆湮滅于無聞獨公之墓高不踰丈豐碑尚存豈特
忠義足以垂名于不朽世亦以顏魯公之賢而此碑
尤為可貴也墓之東有碑缺二字之祖贈邢州刺史為
居民斧而剝之所謂側門是也自衡之後子孫無顯
宦于唐今有隸編戶者猶收公誥官置墓田俾耕以

守誥為前政取去莫知所在大宋崇寧二年七月一

日編脩國朝會要所檢閱文字范致君記

金薤
琳瑯

宋廣平碑側記

右唐宋廣平碑側記顏魯公撰載廣平任御史時持
服於沙河縣屬突厥寇趙定州河朔涵懼邢州刺史
黃文軌投艱於公公以父母之邦金革無避及賊至
城下公為曉陳禍福其徒有素聞公威名者相率而
去之開元末安西都護趙含章冒於貨賄多以金帛

賂朝廷之士九品以上悉皆有名後節度范陽事覺
有司以聞玄宗將加黜責公一無所受乃進諫焉玄
宗納之遂御花萼樓一切釋放舉朝皆謝公衣冠儼
然獨立不拜翌日玄宗謂公曰古人以清白遺子孫
今卿一人而已公曰含章之賄偶不及臣門非不受
也玄宗深嘉之又云公第八子衡因謫居沙州參佐
戎幕吐蕃入寇陷於賊庭素聞太尉名德曰唐天子
我之舅衡之父舅賢相也其可留乎大歷十一年以

三百騎晝夜護歸此皆廣平逸事有以見其清德冠
當世威名動夷狄如此而新舊史皆不載故并錄之
於此俾覽者得詳焉

金石錄

右唐宋文貞公碑并碑側記皆顏魯公撰并書文貞
墓在沙河縣碑久埋沒土中近余友方思道作縣出
之重樹於墓以搨本見示金石錄謂碑與新史不同
者二事又謂碑側記載文貞逸事甚詳而新舊史皆
無之子家藏魯公大集中有此碑因得比較以補石

本之缺但其文時有小異如集本云建一言而天下倚平碑一言作一陽集本云曾祖弘俊碑作弘峻集本云嘗夢大鳥啣書吐公口中公吐之碑作大鳥銜書吐公口中而咽之集本云優游自免碑作鄉里集本云左右震竦碑左右作天后集本云勅使馳救之碑救作救集本云與執政通同碑作與執政通問集本云玄宗將幸西蜀碑作中宗將幸西京集本云公盛氣詰之碑氣作色集本云東宮有大功宗廟社稷

主也安得異議碑作春宮有大功王安得異議集本
云駕幸洛陽碑作駕達東都集本云馳道險隘行不
得前碑作馳道隘稽車馳騎不得前集本云以臣免
之碑臣字下有言字集本云母寵愛子碑作母寵子
異集本云勅公按覆碑無勅字集本云置之座右碑
之作諸集本云仲冬十九日碑作十有九日集本云
喪墓官供碑喪墓作器墓集本云戊寅歲五月碑無
歲字集本云叨太僕之下烈碑烈作列集本云義形

言色碑言作顏集本云既遷鄴城碑遷作還集本云

汗洽流漿碑流作如其不同者又如此

金薤
琳瑯

廣平郡公宋璟碑并碑側記大曆七年九月顏真卿

撰并正書今在沙河縣西北八里墓上

金石文
字記

顏杲卿殘碑

顏真卿撰并正書大曆九年

金石
錄

贈太子賓客冀國靖公竇希球碑

裴耀卿撰姪臯行書大曆七年正月一日立

復齋
碑錄

太子少傅辛惟謙碑

邵說撰張少悌書大厯七年

京兆金石錄

昭義節度薛嵩神道碑

禮部郎中程浩撰梁州都督府長史翰林待詔韓秀實八分書薛公名嵩楚王之子也初為史思明將朝義敗以其地降即拜昭義節度封平陽郡王碑以大

厯八年立在夏縣

集古錄目

左監門衛大將軍劉光朝碑

李端撰張煥書大曆八年

京兆金石錄

贈工部尚書郝王碑

吏部侍郎楊炎撰前果州都督府長史翰林待詔韓

秀實八分書王太原厭次人也官至河西隴右副元

帥封安邊郡王碑以大曆九年立

集古錄目

贈兵部尚書王忠嗣碑

元載撰王縉行書大曆十年四月

金石錄

唐朔方河東河西隴右節度使清源公王忠嗣碑中

書侍郎元載撰門下侍郎王縉書載其女夫也所記
事與史不甚異其文詞瑣冗無足多者縉於書稱名
家與李邕相伯仲評者謂其過薛少保今其結法清
婉老勁不在嶽麓雲麾下覽者自當得之

舟州山人藁

忠嗣歿於天寶初碑立於大曆十年元載撰丈王縉
書載忠嗣女夫縉王摩詰兄也縉名能書結法老勁
真可與李邕伯仲然姿態婉媚啟後世如趙承旨諸

人書者此等碑也

石墨
鵝華

王公此碑元載撰文夏卿書丹一時翁塔冰玉照人
矣字結體規模北海而肥余曾于盧岡卿書室見之
記憶不真固近世稀有也聊存之

玄贖記

刑部尚書李光進碑

戶部尚書楊炎撰梁州司馬韓秀實八分書光進字
大應光弼之弟官至刑部尚書封武威郡王碑以大

歷十年立在富平

集古錄目

元和中李光進碑楊炎撰韓秀實書唐有兩李光進

其一光顏之兄其一光弼之弟此碑乃光弼弟也唐
史書此兩人事多誤新書各為傳以附顏弼遂得其

正集古錄

商州刺史歐陽瑄碑

顏真卿撰并正書大曆十年十月金石錄

瑄字缺渤海人仕至商州刺史武關防禦使去官

不仕而終碑以大曆十年十月立集古錄目

右歐陽瑄碑顏真卿撰并書余自皇祐至和以來顏

求歐陽氏之遺文以續家譜之闕既得顏魯公歐陽
瑄碑又得鄭真義歐陽謚墓銘以與家傳舊譜及陳
書元和姓纂諸書參較又問於呂學士夏卿夏卿世
稱博學精於史傳因為余考正訛舛而家譜遂為定
本然獨瑄碑所失者四顏魯公書穆公封山陽郡公
呂學士云陳無山陽郡山陽今楚州是也當梁陳時
自為南兖州而以連州為陽山郡然則陳書及舊譜
皆云穆公封陽山公為是而顏公所失者一也舊譜

皆云堅石子質南奔長沙顏公云自景達始南遷其所失者二也歐陽生自前漢以來諸史皆云字和伯而顏公獨云字伯和二字義雖不異然當從衆又顏氏獨異初無所據蓋其繆爾其所失者三也元和姓纂及謚銘皆云肩約之子而顏公獨以為紇子其所失者四也瑤之世次不應舛亂如此蓋謚之卒葬在咸亨上元之間去率更未遠義真所誌宜得其實瑤卒大歷中唐之士族遭天寶之亂失其譜系者多顏

公之失當時所傳如此不足怪也治平元年夏至日

書銘闕其末數句不補

集古錄

右僕射裴遵慶碑

楊結撰盧曉八分書并篆額大曆十一年三月

金石錄

右唐裴遵慶碑唐書列傳載遵慶所列官甚簡畧以碑考之其尤著者自吏部郎出為濛陽太守貶符陽令徵拜禮部郎中而史不載肅宗朝拜給事中累遷尚書右丞兵部戶部侍郎再授吏部而史但言為吏

部侍郎而已又史云遵慶薨時年九十餘碑云年八十五碑云遵慶字貞孝而史無之皆其闕誤也

金石錄

張同敬碑

程休撰戴千齡書大曆十一年三月

金石錄

兖州都督劉好順碑

梁秉撰元訥正書盧曉八分題額大曆十二年四月

金石錄

太保昭武公李抱玉碑

中書侍郎平章事楊綰奉勅撰刑部尚書顏真卿奉
勅書昭武河西武威人本姓安後姓李氏肅宗所賜
也初名重璋後名抱玉玄宗所改也代宗時終于河
西隴右副元帥同平章事涼國公追贈太保謚曰昭

武碑以大曆十二年立

集古
錄目

碑陰祭文韓雲卿撰子自正正書大曆十三年

京兆
金石

錄

右鳳翔澤潞行營副元帥涼國武昭公李抱玉碑楊

文貞縮撰顏文忠真卿書見趙明誠金石錄余得之
乃一舊拓本最精好而中缺兩處幾二百許字蓋成
帖後脫落見殘非石泐也楊公銜稱贈司徒當是丈
成而卒於位其家乞顏公追書之故耳大歷中名臣
無如二公者而一撰丈一書丹在涼公誠幸也第公
起邊將中興名位差肩李郭而能守忠節以顯融終
介弟承之又大開方面勲且公一武弁能力辭王爵
辭司空辭左僕射以視僕固懷恩輩不天壤哉然則

徵二公公故不朽也非幸也

夔州續業

巴州刺史鮮于昱碑

喬琳撰陶千歲正書大曆十二年七月

金石錄

杜濟碑

顏真卿撰并正書大曆十二年十一月

金石錄

大曆十二年杜濟神道碑顏真卿撰并書藝之至者如庖丁之刀輪扁之斲無不中也顏魯公之書刻於石者多矣而有精有粗雖他人皆莫可及然在其一

家自有優劣余意傳模鐫刻之有工拙也而此碑字畫道勁豈傳刻不失其真者皆若是歟碑已殘缺銓

次不能成文第錄其字法爾

集古錄

六一先生跋杜濟神道碑蓋集古錄第四百五卷也今吉水貢進士曾三異有此碑而未殘缺其文可讀

得非嘉祐以前舊本歟

益公題跋

顏魯公書撰杜濟神道碑沈著端重真可入木八分友人曾三異無疑寶藏之按六一先生集古跋謂殘

缺不能成文今乃粲然可讀得非摹拓有先後耶濟
蓋魯公友婿故又誌其墓六一先生亦有跋云顏撰
而不云書筆法非魯公不能為世頗以為非顏書更
俟識者辨之今考魯公文集大抵碑詳而誌畧亦微
有異同如碑以濟祖仕明堂丞誌則云今碑以濟為
憲第二子誌作第三又碑與誌並歷渭南宰而文集
于碑中乃以為尉皆傳寫之誤當以此碑為正

益公
題跋

台州刺史康希銑碑

顏真卿撰并正書大業十二年

金石錄

康希銑碑顏真卿撰并書在離渚官遣匠摹本為村

民擊碑

諸道石刻錄

王師乾碑

中書侍郎平章事楊綰撰大理司直張從申書師乾
字脩然瑯琊臨沂人官至諫議大夫盧循道三州刺

史碑以大曆十三年立在句容

集古錄目

大曆十三年王師乾神道碑張從申書余初不甚以

為佳但怪唐人多稱之第錄此碑以俟識者前歲在
毫社因與秦玠郎中論書玠學書於李西臺建中而
西臺之名重於當時余因問玠西臺學何人書云學
張從中也問玠識從申書否云未嘗見也因以此碑
示之玠大驚曰西臺未能至也以此知世以鑿書為
難者誠然也從申所書碑今絕不行於世惟余集錄
有之者吳季子碑陰記崔圓頌德碑并此纔三爾

集古

錄

太子典膳郎鄭君碑

李翰撰徐珙八分書李陽冰篆大曆十三年十月

金石

錄

兵部郎中張君碑

撰序人姓名殘缺郝昂撰銘史惟則八分書大曆十

三年

金石錄

賜司徒扶風郡王馬璘碑

常袞撰大曆十三年

京兆金石錄

張敬因碑

敬因南陽西鄂人子巨濟為淮西節度使追贈敬因
和州刺史此碑埋沒已久慶歷初縣民耕出之遠近
聞者爭往模搨村民厭苦其擾遂擊碎之今在者數
段耳人猶模之故其文不完真卿官爵及立碑年月

則皆亡矣

集古
錄目

大曆十四年張敬因碑顏真卿撰并書碑在許州臨
潁縣民田中慶歷初有知此碑者稍稍往模之民家

患其踐田稼遂擊碎之余在滁陽聞而遣人往求之
得其殘缺者為七段矣其文不可次第獨其名氏存
焉曰君諱敬因南陽人也乃祖乃父曰澄曰運其字

書尤奇甚可惜也

集古錄

魯公之碑世所奇重此尤可珍賞也廬陵歐陽修書

六一
題跋

夔州都督府長史顏勤禮碑

勤禮曾孫魯郡公真卿撰并書勤禮臨沂人顯慶中

終于夔州都督府長史立石年月皆亡

集古錄目

右顏勤禮神道碑顏真卿撰并書序顏溫二家之盛云思魯大雅在隋俱仕東宮慈楚彥博同直內史省遊秦彥將皆典祕閣按唐書云溫大雅字彥弘弟彥博字大臨弟大有字彥將兄弟義當一體而名大者字彥名彥者字大不應如此蓋唐世諸賢名字可疑者多封德彝云名倫房玄齡云名喬高士廉云名倫顏師古云名揣而皆云以字行倫喬倫揣在唐無所

諱不知何避而行字余於中書見顏氏裔孫有獻其家世所藏告身三卷以求官者其一思魯除儀同制其一勤禮除詹事府主簿制其一師古加正議大夫制思魯制云內史令臣瑀宣者蕭瑀也侍郎臣封德彝奉舍人臣彥將行不應內史令書名而侍郎舍人書字又必不稱臣而書字則德彝彥將皆當為名師古制有尚書左僕射梁國公玄齡右僕射中國公士廉又有吏部尚書君集者侯君集也侍郎纂者楊纂

也四人並列于後不應二人書名二人書字也則玄齡士廉亦皆當為名矣又師古與令狐德棻同制不應德棻書名而師古書字則師古亦當為名也然余家集錄有申文獻公兆記是高宗時許敬宗撰云公諱儉字士廉敬宗與士廉同時人而為其家作記必不繆誤則士廉又當為字也然告身書字在理豈安今新唐書雖云房玄齡字喬顏師古字籀以高儉字兆記為名則喬籀果為字乎又按元和姓纂封氏裔

人隋通州刺史繡生四子曰德潤德輿德如德彝又云德彝更名倫亦不知果是否唐去今未遠事載文字者未甚訛舛殘缺尚可考求而紛亂如此故余嘗謂君子之學有所不知雖聖人猶闕其疑以待來者

蓋慎之至也

集古錄

右唐顏勤禮碑魯公撰并書元祐間有守長安者後圃建亭榭多輦取境內古石刻以為基址此碑幾毀而存然已磨去其銘文可惜也

金石錄

顏默殘碑

右唐顏默殘碑者初潁川人家以其石為馬臺皇祐中王回深父之弟同容見見而識其為魯公書因模本以傳深父為文以記之默仕晉為汝陽太守故大歷中魯公追建此碑於汝陰焉

金石錄

容州都督元結碑

湖州刺史顏真卿撰并書元結字次山官至容州都

督本管經畧使碑以大歷中立在魯山縣

集古錄目

唐自太宗致治之盛幾乎三代之隆而惟文章不能
革五國之弊既久而後韓柳之徒出蓋習俗難變而
文章變體尤難也次山當開元天寶時獨作古文其
筆力雄健意氣超拔不減韓之徒也可謂特立之士

哉

集古
錄

右唐元結碑顏魯公撰并書按唐書列傳結後魏常
山王遵十五世孫而碑與元氏家錄序皆云十二世
蓋史之誤又碑與元和姓纂皆云結高祖名善禕而

家錄作善禘未知孰是也

金石錄

鳳翔節度孫志直碑

禮部尚書裴士淹撰太子少保致仕韓擇木八分書
孫公名志直字無撓河西姑臧人後家于京兆嘗為
鳳翔尹隴右四鎮節度封晉昌王罷以本官奉朝請
待制集賢院議軍國事先自營其墓而立此碑無所

刻年月

集古錄目

唐孫志直碑大厯中立

諸道石刻錄

雁門王田承嗣神道碑

代宗時魏博節度使雁門郡王田承嗣碑營田副使
裴抗撰子緒碑節度判官邱絳撰按唐書列傳承嗣
十一子維朝華繹綸綰緒繪純紳縉而緒次當第七
此二碑皆以緒為第六子而無綰自緒而下有繪純
紳經與史不同二碑當時故吏所作必不誤蓋史之
繆也其文與字皆不佳故余特錄其世次而已

集古
錄

杜佑志思碑

在撫州大厯十三年建包吉文

輿地碑目

陳子昂旌德碑

大厯中東川節度使李叔明立陳子昂旌德碑於梓

州而學堂至今猶存

唐書陳子昂傳

廣州李勉碑

大厯中李勉為廣州刺史在官累年器用車服無所
增飾及代歸至石門停舟悉搜家人所置南貨犀象
諸物盡投之江中耆老以為可繼前朝宋璟盧貞李

朝隱之徒人吏詣闕請立碑代宗許之

舊唐書本傳

信州孫宿碑

代宗時孫宿為信州刺史有惠政郡人請立碑頌德

優詔褒美

舊唐書本傳

補李愷碑

唐李愷碑大厯四年李紇撰新唐書列傳云愷十餘子江涵風瀛等同被害惟源澎免據李紇載愷子見於碑者實十二人曰右補闕澎汝州刺史深華陰丞

颯左驍衛兵曹瀛破石丞沈洪州別駕漸洛陽尉渭
司農主簿汶又云公之薨也彭從玄宗南狩次公而
沒深授任他郡其在洛陽者長子江第三子涵與華
陰驍衛而又少子合六人皆從公殲於虜刃破石而
下與衆孫之在者僅以孩提免如紆所記愷子盡於
是矣未嘗有源也紆但言衆孫孩亦不云有未名子
也然則源者史家何從而得之據史言源為司農主
簿以碑考之源當為汶也又據碑方愷歿於賊也彭

深澣沉渭汶六子獲免而史惟云源彭此當以碑為
正當代宗時為愷作碑紆自云與愷有通家之好幼
奉升堂之慶宜知愷事不謬也

集古
錄

右唐李愷碑李紆撰歐陽公集古錄云新唐書列傳
載愷十餘子江渢涵瀛等同被害惟源彭免據李紆
言愷子見於碑者十二人未嘗有源也然則源者史
家何從得之據史言源為司農主簿以碑考之源當
為汶余按穆宗實錄載源事首尾其詳云愷被害源

方八歲為賊虜流浪南北展轉人家凡七八年洛陽平父之故吏以金帛贖之歸於近親代宗聞之授河南府參軍自司農主簿棄官寓居洛陽惠林佛寺垂五十年至長慶中御史中丞李德裕表薦拜諫議大夫時年八十餘矣竟辭不受又李德裕會昌一品集載薦源長表其事皆同然則史不為無據蓋疑初名汶後改為源耳又唐人袁郊甘澤謠載源隱居拜官皆同惟書僧圓澤事頗為怪誕難信然至其名亦

不應謬誤也

錄金石

六藝之一錄卷六十九

欽定四庫全書

六藝之一錄卷七十

錢唐倪濤撰

石刻文字四十六

唐刻 豐碑

少府監贈兵部侍郎李自正碑

抱玉子

朱巨川撰韓秀弼書并篆建中元年

京兆金石錄

贈太尉杜鴻漸碑

中書侍郎平章事元載撰門下侍郎平章事王縉書

鴻漸京兆杜陵人位至門下侍郎平章事衛國公贈

太尉謚文獻碑以代宗時立不載年月集古錄目

唐贈太尉杜鴻漸碑建中二年立京兆金石錄

贈左僕射裴敞碑

從姪次元撰皇甫閱正書并篆建中二年京兆金石錄

門下侍郎王縉碑

李紆撰姪執書建中三年京兆金石錄

贈左散騎常侍路太一碑

獨孤良弼撰并書建中四年

京兆金石錄

宋州刺史王仁敬碑

張兢撰張少悌正書興元二年

京兆金石錄

鄭州司馬元待聘碑

劉太莫撰韓秀弼八分書貞元二年九月

金石錄

贈司空尚可孤碑

鄭雲遠撰并行書貞元二年

京兆金石錄

張延賞碑

趙贊撰歸全八分書貞元三年七月 又一碑正書

元和八年十二月建金石錄

尚書右丞王維碑

庾承宣撰鄭綱書貞元三年京兆金石錄

內侍監魚朝恩碑

吳道玄撰吳道微行書貞元四年五月金石錄

右唐魚朝恩碑吳道玄撰吳道微書朝恩雖以譴死

然其徒如竇天場焦奉超者猶居中用事故德宗朝

詔為立碑吳通玄兄弟於陸贄謗毀抵排無所不至
至為朝恩碑則稱頌功德如此可以見其為人矣

金石

錄

豫州刺史狄梁公碑

元通禮撰黨復書貞元三年重立

訪碑錄

嗣曾王戢碑

趙贄撰行書無姓名貞元四年七月

金石錄

工部尚書享京泉碑

李竦撰韓秀榮八分書貞元六年正月

金石錄

右唐京杲碑按元和姓纂載字氏云懷節生言為都水使者言生雲京杲而碑乃云懷節生思廉為左驍衛大將軍公即大將軍之愛子金城郡王之從父弟新史所書亦同金城郡王即雲京也然則姓纂以京杲為言之子雲京之同父弟誤矣

金石錄

正晦先生碑

先生姓陳名融貞元五年東平呂溫述

輿地碑目

相州刺史李孟簪碑

子軫撰孫良鈞八分書子翼篆額貞元八年立

京兆金石

錄

贈戶部尚書符令奇碑

鄭叔規撰貞元八年立在富平

京兆金石錄

鄭叔清碑

于翰撰韓秀榮八分書貞元九年七月

金石錄

左僕射韋安石碑

賈至撰孫元行書貞元九年八月

金石錄

贈秘書監邠國公韋斌碑

王維撰僧元真書貞元九年

金石錄

長安尉王之域碑

于邵撰韓秀榮八分書貞元十年正月

金石錄

太子賓客李翼碑

于邵撰子執鈞書子正鈞篆額貞元十年立

京兆金石錄

漢陽王張柬之碑

李邕撰瞿令問八分書貞元十二年十一月金石錄

相國趙憬碑

權德輿撰歸登八分書貞元十三年九月金石錄

彭王傅徐浩碑

張式撰次子現正書貞元十五年十一月金石錄

宣武節度董晉碑

中書舍人權德輿撰皇太子侍書殿中丞王丕書晉
字渾成河東虞鄉人官至宣武節度使碑以貞元十

五年立

集古錄司

左僕射李晉碑

李紆撰楊同恕書貞元十五年

京兆金石錄

昭義節度使王虔休碑

撰人姓名殘缺徐現正書貞元十六年四月

金石錄

右唐昭義軍節度王公碑其名已殘缺以事考之蓋

王虔休也與唐書列傳所載官爵行治多同惟碑云

贈右僕射傳為左僕射小失不足道而碑與傳皆云

虔休汝州梁縣人元和姓纂以為范陽人非也

金石錄

李說碑

鄭儋撰柳公權正書貞元十六年十月

金石錄

焦旣碑

從弟郁撰來獻行書貞元十八年七月

金石錄

宣武節度昭德郡王劉全諒碑

楊於陵撰徐歲器書貞元二十年

京兆金石錄

劍州長史李廣業碑

貞元二十年十一月鄭雲遠撰正書今在三原縣

金石

文字記

長史名廣業曾祖淮南王神通父雲麾將軍璲子為都統國貞貞子庶人錡也以錡顯故立碑碑立之未五年而錡用叛僂矣夫一傳而子死事再傳而孫死叛不亦大徑庭哉碑辭多泐闕不可讀書撰人有曰尚書刑部侍郎上柱國原武男有曰使持節華州諸軍事者而皆不可考矣書法極清婉可翫集古金石

諸書俱遺之因志其畧

弇州山人業

廣業即孝同之孫為劍州長史長子國貞為王元振所害者次子若水仕金吾衛大將軍通事舍人功名俱不顯以國貞子錡貴始樹此碑考之史國貞原名若幽而附若水于李齊物傳云齊物族弟不言為國貞親弟又孝同碑云有子瑱此碑云雲麾將軍璿公之烈考則廣業家世歷歷可尋至錡以叛遂亡此碑貞元二十年立后五年錡始叛也王元美謂書撰人

皆不可考今碑中有云謂雲遠嘗學舊史云云而前

署撰者官刑部侍郎當是鄭雲遠次雲遠正與李錡

同時撰文亡疑但碑又云上柱國原武縣開國男雲

遠傳不及或史畧之耳書者則誠不可考書法直是

徐浩敵手

石墨
鐫華

贈越州都督符元亮碑

不著書撰人名字其字畫柳公權書也元亮其字也

缺其名而不書仕唐至神策軍將軍贈越州都督碑

以貞元中立

集古錄目

萬州刺史苗拯碑

張瓘撰王山從八分書苗端題額永貞元年十二月

金石錄

歙州刺史盧瑛碑

裴度撰裴潏正書元和元年

金石錄

贈太子太保顏杲卿碑

弟真卿撰盧佐元正書元和元年十月

金石錄

從弟真卿撰外姪盧佐元書大歷九年魯公書建至
貞元十八年傾倒石折元和元年十月孫男証重建

立復齋碑錄

右唐顏杲卿碑真卿撰元和中舊石剝缺其甥盧佐
元重書而刻之舊唐史言杲卿既殺蔣欽湊等玄宗
知之加杲卿衛尉卿兼御史大夫以袁履謙為常山
太守杲卿為司馬今以碑考之乃進兼中丞赴京而
以賈深為司馬新史之所書亦同蓋舊史之謬碑又

言公初被害揭首於右金吾街樹有張湊者收其髮
謁玄宗俄見夢云禦捍處多兵馬少玄宗哭而設祭
焉後湊以髮至夫人疑之憑床而哭忽聞聲如鞭床
者髮箱跳而前夫人方駭信之其事甚怪而舊史不
書新史所載亦簡畧杲卿忠義之節貫金石其死宜
不昧而魯公之語可信不疑故盡錄其事于此

金石錄

左拾遺竇叔向碑

羊士諤撰竇直正書元和三年十月

金石錄

刑部侍郎劉伯芻碑

段文昌撰沈傳師正書元和三年

京兆金
石錄

國子司業李璿碑

姪宗撰正書無姓名胡季良篆元和四年五月

金
石錄

贈左僕射劉公碑

呂溫撰戴少平行書元和四年

京兆金
石錄

左僕射裴倩碑

權德輿撰張弘靖正書胡証篆額元和四年

京兆金
石錄

贈吏部尚書武就碑

權德輿撰鄭餘慶正書元和五年三月

金石錄

右唐武就碑就元衡父也元和姓纂載平一四子集
備就登備生元衡今此碑與唐書宰相世系表皆以
元衡為就子姓纂元和中修是時元衡為宰相不應
差其世次豈余家所載本偶爾脫誤乎當俟別本校

正金石錄

相國賈耽碑

鄭餘慶撰并正書元和五年三月

金石錄

冠軍將軍烏承玘碑

許孟容撰胡証八分書并篆元和七年正月

金石錄

左散騎常侍河南尹許孟容撰魏博節度副使胡証
八分并篆額承玘字德潤張掖人官至右領軍使冠

軍將軍此碑不完纔有其半不見所立年月

集古錄目

左常侍路公碑

韓愈撰鄭餘慶正書元和七年十月

金石錄

襄陽郡王路公碑元和七年國子博士韓愈撰吏部

尚書鄭餘慶書右拾遺陳祐篆額

韓文考異

左僕射裴耀卿碑

許孟容撰歸登八分書并篆元和七年十月

金石錄

右唐裴耀卿碑許孟容撰宋次道春明退朝錄載皇

祐中王沂公曾之弟子融侍郎守河中還以唐明皇

所題裴耀卿碑額上之仁宗遂御篆賜沂公碑額曰

旌賢今此碑元和中立文與額皆歸登書非明皇所

題疑子融所上乃明皇書裴光庭碑耳耀卿光庭二

碑皆在絳州也又按新唐史列傳云耀卿字煥之宰

相世系表作渙之而碑乃字子煥傳云耀卿守真次

子而碑乃為第三子皆史家之謬

金石錄

贈司空令狐承簡碑

子楚撰并書元和七年

京兆金石錄

贈左監門衛將軍劉希果碑

李益撰從姪佐時行書元和七年

京兆金石錄

劉統軍碑

韓愈撰歸登八分書元和八年

金石錄

右唐劉統軍碑字書雖殘缺猶歷歷可辨以昌黎集本校之時有異同皆當以碑為是惟叙其世系不同則疑碑之誤集本云公曾祖考為湖州守祖令太原再世北邊樂其高寒棄楚不還逮於公身三世晉人而墓誌之云曾大父諱承慶朔州刺史大父巨敖為太原晉陽令遂著籍太原之陽曲此碑乃云考令太

原又云再世晉人且碑既言陽曲之別錄公祖遷則其為晉人非再世明矣余故曰石本誤也碑當時所立其諸子皆在不應差其世次而錯謬如此莫可曉

也

金石錄

余讀昌黎作劉昌裔碑竊疑其謂既葬將反柩于京師知其必有誤也且既葬矣安得而反柩哉因求其碑偶存為考其文是反柩于京書之所傳其論如此豈不使後世疑耶其餘雖于義不甚相妨然因其謬

誤可以復證也碑云陳許軍節度使今本無軍字反
机于京碑無師字不可以証碑無以字有太史之狀
有太常之狀而無下有字蘇民戰敵碑為軋敵陳力
應變碑為陳方僕射已都碑作以都書曰苗害碑作
熘害以文考次知書本為誤乃知碑刻之傳于當時
者不可証也後世校讐不得原本因誤就論不究其
意隨已所見致文字錯亂以疑後學可勝歎哉

廣川書跋

興元節度使裴玢碑

裴度撰劉遵古行書元和九年十一月

金石錄

右唐裴玢碑晉公裴度撰碑已斷裂其族姓名氏磨滅不可辨識但云公名玢字連城以事考之蓋裴玢也元和中為興元節度使以疾歸朝卒新舊史皆有傳舊史云五代疎勒國王綽武德中來朝授鷹揚大將軍天山郡公因留為京兆人而新史乃云名糾今碑所載與舊史同不知新史何所據而改為糾乎疑轉寫誤爾又新舊史皆云綽珍五世祖而碑云高祖

亦當以碑為正

金石錄

太子賓客孔述睿碑

鄭綱撰鄭餘慶書元和十一年六月

金石錄

贈兵部尚書王用碑

韓愈撰元和十一年立

京兆金石錄

太傅岐國公杜佑碑

李吉甫撰張弘靖書袁滋篆額元和十一年

京兆金石錄

贈司空于頔碑

張躬撰劉伯芻八分書元和十二年六月

金石錄

右唐于負碑集古錄載負碑云盧景亮撰今此碑乃張躬疑負有兩碑景亮所撰余錄中偶無之當俟訪

求

金石錄

于負神道碑盧景亮撰其文辭雖不甚雅而書事能
不沒其實負之為人如其所書蓋篤於信道者也碑
云司馬遷儒之外五家班固儒之外八流其語雖拙
蓋言其學不駁雜也然非徒貶去釋老而已自儒術

之外餘皆不學爾碑又云其弟可封好釋氏貧每非
之貧于頓父也然可封之後不大顯而貧之後甚盛
以此見釋氏之教信嚮者未必獲福毀販者未必有
禍也碑言貧薦於孝弟守節安貧不可動以勢利其
所履如此足以興其後世矣

集古錄

贈左武衛上將軍彭獻忠碑

張仲素撰郭叔瑜書王遂篆額元和十二年

京兆金石錄

左常侍李衆碑

李絳撰裴璘正書元和十三年十二月金石錄

贈揚州大都督蕭昕碑

孟簡撰并書賀拔恕篆額元和十三年京兆金石錄

著作郎權公碑

趙贇撰序鄭綱銘鄭餘慶分書元和十四年立訪碑錄

涪陵郡王焦伯瑜碑

邢叔度撰孫藏器行書元和十四年京兆金石錄

左常侍薛革碑

孟簡撰柳公權正書元和十五年又正月

金石錄

右唐薛平碑唐史列傳云平父順為奉先尉而此碑

及元和姓纂皆云名順先蓋史誤

金石錄

太子賓客呂元膺碑

李絳撰袁璘正書元和十五年七月

金石錄

右唐呂元膺碑舊唐史云元膺字景文新史云字景

大而碑乃字孟淳新舊史皆云元膺自御史中丞拜

岳鄂觀察使而碑乃云岳鄂觀察兼中丞爾其卒也

舊史云謚曰憲而碑作獻皆當以碑為據

金石錄

太子少保田公碑

李宗閔撰篆書無名殘缺元和十五年九月

金石錄

右唐檢校太子少保田公碑李宗閔撰文字殘缺以事考之蓋田弘正之兄融碑也弘正帥魏博詔以融為相州刺史使之相近唐史稱弘正幼孤事融甚謹軍中常分曹習射弘正聯中融怒退杖之故當田季安猜暴時能自全及為軍中推迫融不悅曰爾竟不

自晦取禍之道也其後弘正與其子布皆被禍如融
言融兄弟父子出于軍旅其智畧皆過人如弘正布
之忠義融之先見真一代之豪傑也碑為篆字題嵩
山布衣書而姓名磨滅不可識其筆蹟頗佳

金石錄

昭義節度使辛秘碑

牛僧孺撰陳諫正書元和中立

金石錄

右唐辛秘碑與新舊史所載大畧相同惟碑與舊史
本傳皆云登五經開元禮科而新史云舉明經碑云

其卒贈右僕射而新舊史皆作左僕射耳又舊史云
謚曰昭而新史云謚曰肅後更謚懿碑不載其謚莫

知孰是也

金石錄

刑部侍郎歸融碑

男登撰行書元和中立

京兆金石錄

武昌軍節度使元稹碑

白居易撰元和中立

京兆金石錄

張誠碑

白居易撰武翊黃正書姪孫蟠篆長慶二年八月

金石

錄

贈太保李良臣碑

李宗閔撰楊正書長慶二年

金石錄

安定郡王李光進碑

令狐楚撰李元行書

金石表

右唐李良臣碑良臣李光顏之父也碑李宗閔撰文
詞爾雅可喜宗閔牛僧孺皆一代奇才而自陷朋黨

惜哉

金石錄

良臣光進之父官止雞田州刺史以光顏故贈太保
與二子光進光顏同墓一地此李光進乃光顏之兄
與弟光顏並為唐名將非光弼弟也碑今在榆次縣
金石文
字記

左武衛將軍劉德憲碑

嚴綬撰劉繼元書陸邛篆額長慶二年

京兆金石錄

少府監胡珣碑

即胡良公碑歐陽真古錄跋補錄於下

韓愈撰胡証八分書長慶三年四月

金石錄

潮州刺史韓愈撰左金吾衛大將軍胡証八分書并篆額珣字潤溥貝州宗城人官至少府監碑以長慶

三年四月立在蒲城縣

集古錄目

贈左僕射郭公碑

李宗閔撰蕭佑正書長慶三年八月

金石錄

山南節度韋綬碑

中書侍郎平章事牛僧孺撰給事中于敖書綬字子

章京兆人官至山南西道節度使碑以長慶三年立

集古

錄目

贈太尉司徒中書令韓弘碑

韓愈撰長慶三年

京兆金石錄

胡良公碑

即少府監胡珣

長慶三年胡良公碑韓愈撰良公者名珣韓之門人

張籍妻父也今以碑校余家所藏昌黎集本號為最

精者文字猶多不同皆當以碑為正茲不復紀碑云

珣子逞迺巡遇迷遷造而集本無巡他流俗所傳本

又有云遇或為巡者皆非也當以碑為正

集古錄

崔能神道碑

兵部侍郎李宗閔撰能弟檢校吏部尚書判東都尚書省從書戶部尚書胡証篆額能字子才清河東武城人官至嶺南節度觀察使贈禮部尚書碑以長慶

三年立

集古錄目

崔能神道碑云拜御史中丞持節觀察黔中仍賜紫

衣金印按唐世無賜金印者官制古今沿革不同而其名號尚或相襲自漢以來有銀青金紫之號當時所謂青紫者綬也金銀者乃其所佩印章爾綬所以繫印者也後世官不佩印則此名虛設矣隋唐以來有隨身魚而青紫為服色所謂金紫者乃服紫衣而佩金魚爾宋閔所謂賜金印者繆也今世自以賜緋銀魚袋賜紫金魚袋結入官銜矣而階今有至金紫光祿大夫者遂於結銜去賜紫金魚袋皆流俗相承

不復討正久矣故因宗閔之失并記之

集古錄

中書令張曲江碑

廣州刺史嶺南節度使徐浩撰并書曲江名九齡字子壽一字博物韶州曲江人開元中官至中書令罷為尚書右丞相貶荊州長史謚曰文獻碑以大歷中

書撰長慶三年立

集古錄目

張九臯碑

工部尚書蕭昕撰九臯孫曾州刺史仲方書九臯范

陽人仕至殿中監以長慶三年立

集古錄目

魏博節度田布碑

陝州大都督府長史陝虢觀察使庾承宣撰前鄉貢進士呂價書布字敦禮官至魏博節度使碑以長慶

四年立

集古錄目

田布碑庾承宣撰布之事壯矣承宣不能發於文也蓋其力不足爾布之風烈非得左丘明司馬遷筆不能書也故士有不顧其死以成後世之名者猶有幸

不幸焉各視其所遭如何耳今有道史漢時事者其人偉然甚著而市兒里嫗猶能道之自魏晉以下不為無人而其顯跡不及於前者無左邱明司馬遷之

筆以起其文也治平甲辰秋社日書

集古錄

兵部郎中郭貽碑

陸邵隸書長慶四年

京兆金石錄

江陰縣令武登碑

長慶三年

金石錄

子儒衡撰并書在緱氏

碑帖攷

嶺南節度鄭權碑

陝州大都督府長史庚承宣撰萬年縣令姚向書權
字復道滎陽人官至嶺南節度碑以寶歷二年立

集古

目錄

鄭權碑寶歷二年姚向書筆力精勁雖唐人工於書
者多而及此者亦少惜其不傳於世而今人莫有知
者惟余以集錄之博得此而已熙寧辛亥孟夏清心

堂書

集古錄

紫陽先生碑

李白撰柳公權正書寶曆三年

金石錄

紫陽先生碑陰

李繁撰柳公綽正書寶曆三年

金石錄

西平王李晟碑

裴度撰柳公權正書太和元年四月

金石錄

右唐李晟碑裴度撰碑載西平子十二人愿聰惣聰憑恕憲惣聰聽甚慙唐史宰相世系表所書亦同而

新舊史列傳皆云晟有十五子舊史云侗伯偕無祿
早世宜以侗等早世故碑不載歟又李石撰李聽碑
云西平有子十六人疑更有未名而卒者再元和姓
纂載西平子十人以碑校之姓纂缺聰總憑懿四人
而懿懿二子墓碑舊史皆無之又其倫次差謬亦當
以碑為正

金石錄

裴晉公撰李西平神道碑以較江浙閩唐文粹本大
率傳寫脫謬且經改易不能遍舉姑言其甚者乾元

初立功成都其邦人咸服具以狀文而諸本盡作具
狀以聞何俗弱也乘墉壑如道道殆有二義當謂士
卒鼓勇升高步險如履平不然以而為如猶春秋書
星隕如雨也今眾本直改作而通道或增一字為軌
道於是下句若巢窺而清宮亦添一禁字按周禮秋
官哲族氏掌覆天鳥之巢鄭氏讀如擿碑盖用此哲
字而諸本盡改為磔尤更淺陋古書日壞俗本日多
此子所以撫卷三嘆也

益公
題跋

右唐西平郡王李晟碑裴晉公撰柳公權正書晟在唐功蓋天下可謂偉矣唐書列傳叙其官時與碑不合碑謂晟由左清道率歷三府右職累遷光祿太常卿傳則云授特進試太常卿碑謂晟為涇原四鎮北庭節度都知兵馬使代宗徵之以左金吾衛將軍為神策兵馬使傳則云以右金吾衛大將軍為涇原四鎮北庭兵馬使碑謂晟平蜀還授檢校太子賓客而傳不書碑謂建中二年以晟為神策先鋒都知兵馬

使加御史中丞尋拜左散騎常侍兼御史大夫傳則
云晟為神策先鋒加檢校左常侍散騎兼魏府左司
馬尋授御史大夫碑謂皇居失守授晟檢校工部尚
書充神策行營節度使則云詔拜神策行營節度使
碑謂大駕再遷加檢校右僕射尋轉左僕射同平章
事兼京兆尹神策軍京畿鄜坊節度觀察等使管內
及商華等州副元帥復詔晟兼河中晉絳慈隰節度
使又兼京畿渭北鄜坊丹延節度招討使又進京畿

渭北鄜坊商華兵馬副元帥傳則云進晟尚書左僕射同中書門下平章事復詔晟兼河中晉絳慈隰節度使又兼京畿渭北鄜坊丹延節度使又兼京畿渭北鄜坊商華兵馬副元帥碑謂鑿輅爰歸拜司徒兼中書令俄以本官兼鳳翔尹鳳翔隴右節度觀察等使及四鎮北庭涇原等州副元帥改封西平郡王傳則云拜晟司徒兼中書令尋拜鳳翔隴右涇原節度使兼行營副元帥徙王西平郡晟之碑作於當

時而史成於後代要當以碑為是

金薤
琳瑯

碑在高陵縣王墓前裴晉公撰柳誠縣書已磨泐不可讀矣都元敬全錄其文止缺數字又別本有刻者與碑亦牴牾數字當是傳寫之誤王元美云是時西平諸子皆已逝獨太保聽存乞晉公文寥落不能發其忠義戡定之績至于料吐蕃背盟事絕不載蓋聽于其時徒見晉公祿位勲業之盛幾埒西平意其文足以光顯其先而不知晉公雖非忌者自以為位宰

相文崇簡要體當如是而于西平之元功偉畧十不
著一二嗚呼今碑首云奉勅撰書末云乃命臣度稱
代言時似非聽乞也元美豈未讀全文耶都元敬又
錄其官時與史不合者極詳今抄具左

云云
見前

要當以

碑為是又碑所記公子十二人史云十五人亦當從

碑

石墨
鐫華

贈開府儀同三司王弘規碑

李德裕撰侯丕正書大和元年

京兆金
石錄

司徒烏重脗碑

司徒平章事裴度撰山南東道節度實易直書脗字
保君太原人官至天平橫海等軍節度使司徒平章

事碑以太和二年立在下邳

集古
錄目

右唐烏重脗碑新唐史列傳云重脗為橫海節度使
討王庭湊久不進兵穆宗以為觀望詔杜叔良代之
以重脗為太子太保長慶末以檢校司徒同中書門
下平章事為山南西道節度使召至京師改節天平

軍文宗初徵拜司徒今以碑考之重胤為橫海節度也長慶元年徙為山南西道周歲徵入改天平軍四年就拜太子太保文宗踐極徵拜門下平章事頃之同中書為司徒餘如故蓋重胤之罷橫海即移鎮興元未嘗拜太子太保而其為太保實帥天平又其帥興元時未嘗兼宰相至文宗即位乃拜耳舊史與文宗實錄所書畧同皆可以正新史之失

金石錄

太尉王播碑

李宗閔撰柳公權正書太和四年正月立

金石錄

中書侍郎平章事李宗閔撰翰林學士承旨柳公權書播字明敬太原人位至左僕射同平章事贈太尉

碑以大和四年正月立

集古錄目

何文愬碑

王源中撰劉禹錫正書大和四年八月

金石錄

侯仲莊碑

杜黃裳撰崔元畧正書大和四年又十月

金石錄

左威衛將軍李藏用碑

禮部侍郎翰林學士王源中撰翰林待詔唐玄度篆
額唐元序集王羲之書藏用宦者也字師貞隴西成
紀人官至冠軍大將軍左威衛大將軍知內侍省隴
西郡開國公碑以太和四年立

集古
錄目

唐元序書在

京兆府

金石
畧

李藏用碑王源中撰唐玄度書玄度以書自名于一
時其筆法柔弱非復前人之體而流俗妄稱借之爾

故存之以俟識者

集古錄目

太和四年王源中撰唐元

度書在京兆

碑帖考

贈右武衛大將軍駱奉先碑

朱景玄撰唐玄度分書篆額大和五年

京兆金石錄

贈司空王潛碑

李宗閔撰崔蠡正書王無悔篆額大和六年

京兆金石錄

義陽郡王苻璘碑

題中書侍郎同平章事李宗閔撰宗閔太和七年為

此官柳公權正書

金石錄

今在富平縣儒學

金石文
字記

右唐符璘碑按唐書列傳璘姓符而碑作符以姓氏書攷之瑯琊符氏出于魯頃公之孫公雅為秦符節令因以為氏而武都符氏出于有扈之後為啟所滅奔西戎代為氏酋本姓蒲至符堅以背有文改焉今此碑以璘為符氏又云其先琅邪人皆不可知然按璘與弟瑤皆封邑于琅邪豈書碑者誤以符為符其家出於武吏不是正乎

金石錄

右領軍衛將軍馬存亮碑

李德裕撰大和七年

京兆金石錄

高瑀神道碑

司徒侍中東都留守裴度撰河南尹鄭澣書瑀字乾亮渤海裔人官至忠武軍節度使贈司空碑以太和

八年立

集古錄目

開府儀同三司崔守誠碑

許康佐撰唐玄度分書并篆大和九年

諸道石刻錄

李石神道碑

東都留守李德裕撰工部侍郎柳公權書碑文殘缺
名字皆不可見考其世系事迹知為李石碑也碑以

大和中立在河陰

集古
錄目

散騎常侍黎公碑

嗣子名缺書大和中立

訪碑
錄

六藝之一錄卷七十